

RAHARAHY TANY IKONGO

Tsy atokisan'ny vahoaka intsony ny fanjakana hoy ny filoha Ravalomanana

MANOLOANA NY VONO OLONA MARO NITRANGA TANY IKONGO FARITRA FITOVINANY, NISY NY FANAMBARANA NATAON'NY FILOHA MARC RAVALOMANANA, FILOHAN'NY RODOBEN'NY MPANOHITRA RMDM, SADY FILOHA NASIÖNALIN'NY ANTOKO TIM:

Ry vahoaka Malagasy, tezitra sady malahelo ny tenako manoloana ny vonoin'olona nitranga tany Ikongo. Tsy afaka ny hangina aho satria Malagasy mitovy amiko izy ireo. Manameloka tateraka ny fampiasan-kery amin'ireo olona tsy manantsiny. Mampahatsiahy fa ny fitaika, ny zandary, ny polisy, ny miaramila dia natao tafiovana iarovana ny fan'ny vahoaka sy ny fananany, hiaro azy amin'ny ainy fa tsy natao hamono azy. Lasa fitaovana famoretana, fampiasana ny jadona, lasa natao iarovana ny fahefana ambony, iarovana ireo tombontsoan'ny mpanana sy olombitsy mila fiambenana, fa tsy araka ny asany. Matoa izao mitranga dia tsy matoky intsony ny fanjakana ny vahoaka Malagasy, tsy matoky intsony ny fitsarana matoa misy izao "vindicte populaire" izao na fitsaram-bahoaka... Aiza ny sefo distrika izay natao ho solontenam-panjakana amin'ireny toerana ireny, manelanelana ireo zandary sy vahoaka, hifampidinika sy hifampiresaka? Fa tonga dia natao tfitra variraka. Amintsika miresaka izao dia misy 23 no voalazan'ity gazety ity... 46 ireo maratra mbola tsaboina. Eto aho dia miondrika am-panajana amin'alahelo tanteraka amin'ireo fianakaviana, havan'ireo maty, ary mampahery ireo mitsabo tena mba ho sitrana haingana. Manaina ny olompirenena rehetra aho samy hahatsiaro ny andraikitra sy adidy amin'ny toerana misy azy avy. Fantatra fa samy Malagasy isika. Iaraha-mahita fa miteny amin'ny teny iray isika eto Madagasikara. Tokony hifamony isika, hifanampy. Ireo izay nanatanteraka ny loza amin'antambo dia tokony hilaza anatan'ny vahoaka ny vokatra ataony. Nisy ny tany Ikongo, nisy ny tany Ankazobe roa volana lasa izay, ary nisy tany Sakay. Aiza ho aiza ny vokatr'ireny zavatra niseho ireny. Mbola mamerina ihany aho fa misy eto amin'ity firenena ity ny atao hoe krizy. Misy eto amin'ity firenena



ity ny antsoina hoe "terrorisme d'etat". Ry mpitandro filaminana, ianareo izay mahafantara sy mahatsiaro tena tsara, tsy ny fahefana hanananareo amin'ny fitaovam-piadiana mahery vaika iny no izy, fa ny feon'ny fietritretanareo. Tsy miady amin'ny nofo aman-drà ianareo, fa amin'ny fanahy ratsy izay manidintsidina eny amin'ny rivotra. Aoka ianareo handinika tsara vao mampiasa an'ireny. Mafy koa raha mafy ny manjo ny vahoaka Malagasy, miaina amin'ny tebiteby, miaina amin'ny tsy fananambola, miaina amin'ny tahotra sy horohoro. Ka dia mangataka amin'Andriamanitra isika, mba omeny fanahy am-pahendrena ireo, mba tsy hamono foana, tsy hampitahotra ny vahoaka Malagasy. Mahaiza mionona ry izy mianakavy tompom-pahoriana sy mana-manjo, fa izao no hetraketraky ny olona miara-miaina amintsika. Tsy hetraketraky ny tany, fa fanahy iniana mihitsy ny namoana olona. Ary ianareo izay tsaboina, ho sitrana soa aman-tsara. Dia homba antsika mandrakariva Andriamanitra."

Ny Valosoa

Hetsika Montpellier

Manameloka tanteraka ny famonoana Malagasy tany Ikongo

Na any antany tavitra aza ny Hetsika Montpellier dia mahatsiaro ireo Malagasy mpiray tanindrazana aminy namoy ny ainy tany amin'ny distrikan'Ikongo. Nisy araka izany ny fanambaràna navokan'izy ireo

Fanambaràna

Ny fikambanana HETSIKA MONTPELLIER, dia maneho ny alahelony noho ireo vono olona mahat-

siravina nataon'ny zandary tany Ikongo, ny alatsinainy 29 septambra 2022. Miara miory tateraka amin' ireo fianakaviana niharan-doza ary miray fahasitranana haingana ho an'ireo maratra. Manameloka tanteraka izao fihetsiky ny zandary izao ny HETSIKA MONTPELLIER. Manaporofon'izao fa efa tsy ananan'ny fokonolona toky intsony, ny rafim-panjakana misy

any an-toerana, ka naleon-dry zareo nandray an-tanana ny toe-draharaha. Kanefa dia tfitra vary raraka no nasetry izany.

Mitaky ny Fanjakana mba:

- Handray an-tanana ny ilain'ireo niharan'ny voina amin'ny lafiny rehetra.
- Hanasazy tsy misy hatak'andro ireo tompon'andraikitra sy mpanatanteraika baiko ka nahatonga

izao vono olona faobe izao.

Tsy manam-piahy intsony ny Malagasy, fa na ireo natao hiaro azy, aza dia lasa biby fampitahorana sy famonoana vahoaka. Omeo rariny ny vahoaka an'Ikongo, omeo rariny ny vahoaka Malagasy. Natao androany, alarobia 31 aogositra 2022, teo Montpellier, France.

Helisoa

VVSD sy ny Collectif des Citoyen d'origine Malgache Monde

Nitondra teny fampiononana ho an'ireo niharam-boina any Ikongo

Mitondra ny teny fampiononana ho an'ireo fianakaviana namoy fianakaviana tany Ikongo ary mirary fahasitranana ho an'ireo naratra izahay Vondrona VVSD sy collectif des Citoyens d'origine Malgache Monde. Izahay hoy ny fanambaràna dia hampita sy hanampy ary hitady ny rariny ny hitsiny mikasika ireny zavava-doza tany Ikongo ireny ary ireo tsy fanajana lalàna tsapa sy hita zarain'ireo Malagasy maro aminay izay mizakana ny tsindry hazo lena. Ankoatra izay dia manasa an'ireo Malagasy monina any ivelany ny fikambanan'ireo Malagasy mizaka ny zompire-

Malagasy any ivelany ho avy hanatrika ny Forum des associations ho atao ny sabotsy 3 septambra 2022 ho avy izao, ao amin'ny tanànan'ny Clamart 92140. Amin'ny maha forum azy dia feno fikambanana ho avy ao ahafahana mifanankalo hevitra sy midinika mikasika ny anjara birikin'ny diaspora aty ivelany ho an'ny firenena misy azy sy ny niaviany. Io forum io dia hiarahana aminy tananan'i Clamart sy ny olomboafidiny izay hanokatra amin'ny fomba Ofisialy izany manomboka aminy 10 Ora maraina hatramin'ny 6ora hariva. Handray anjara ao anatin'ny Forum ny VVSD na

Vehivavy Vonona sy Sahy Diaspora Ary ny 2CO2M na Collectif des Citoyens d'Origine Malgache Monde ao Eoropa. Marihina fa mitsangana amin'ny fomba ara-panjakana daholo ireo fikambanana ireo ary azo jerena eo amin'ny Journal Ofisialy ny firenena Frantsay izany. Ny collectif des Citoyens d'Origine Malgache Monde koa dia mijoro tahaka izany koa ny any États-Unis ho an'ny Amerika avaratra, ary ny zavava-misy tsy ara-drarin'ny sahala amin'izao indrindra no antom-pisiany. Mampahafatatra ny iraisam-pirenena, manamafy ny feon'ny vahoaka tsy mandady

arona any amin'ny tany lavitra andriana, fa indrindra miasa mangina mba tsy ho vita mora sy afa-maina ka manantena hialokaloka any ivelany ireo manao ny tsy mety. Koa ho an'izay aty ivelany ka mazoto ny hifandray sy hahalala misimisy kokoa ny momba anay dia tongava amin'ny asabotsy ho avy izao ao amin'ny Forum des associations Clamart, adiresy place du panorama 92140 Clamart manomboka aminy 10 Ora maraina. Azonao atao koa ny mijery ny pejy Facebook ny Collectif des Citoyens d'Origine Malgache na ny pejy'ny ville de Clamart mikasika izay.

Helisoa

Ny Valosoa sy faka-faka

Miharatsy hatrany ny lalan-kizoran'ny firenena

Miditra sahadry amin'ny volana fahasivy amin'izao taona diavina izao isika ankehitriny. Mihazakazaka ny andro sy ny volana ary volana efa tra sisa araka izany dia hivalona ny taona. Toy izany koa anefa ny zava-misy sy mitranga eto amin'ny firenena, indrindra ny fitrangan-javatra manimba na manaratsy endrika mihitsy ny firenena saiky miseho isan'andro vaky izao. Anisan'izany ny zava-nitranga tany Ikongo izay nahavaky fo sy nandona ny sain'ny olom-pirenena maro. Efa be resaka sy ny famakafakana ny amin'izany manoloana ny fihetsiky ny lazaina ho tandroka aron'ny vozona sy mpiaro ny vahoaka sy ny fananany. Teo ihany koa ny fihetsika sy ny teny nambaran'ny mpitondra isan-tsokajiny miainga amin'ny filohan'ny repoblika. Malagasy mandatsaka aina sy rà malagasy mpiray tanindrazana aminy. Mbola miseho izany ankehitriny ao anatin'izao fitondrana Rajoelina izao izay mihambô ho mahatsapa sy mahalala ny iainam-bahoaka. Aoka tsy ho adinoina fa mipetraka ho tantara, nambaran'ny Andry Rajoelina tao amin'ny Lapan'ny Kolontsaina Mahamasina indray andro, nanoloana ny vahoaka mpanohana azy sy tamin'ny lampihazo mirenty mahazatra azy ireo hoe: "tsy hisy intsony, ary tsy azo ekena ny hisian'ny Malagasy mandatsaka aina sy rà Malagasy". Ny nitranga tamin'ny 7 febroary no tao an-tsainy sy antony nilazany izany tamin'izay. Ankehitriny, efa-taona latsaka kely tamin'ny nitondrany, mitranga sy nataon'ireo olom-peheziny izany. Ny hany mba nambarany aza dia hoe hosokafana haingana ny fanadihadiana. Raha vao mire-saka na miteny hoe "fanadihadiana" koa anefa ny fitondrana dia ny an-tsain'ny olom-pirenena maro ny amin'ireo zava-nitranga maro, izay nisy nahafatesana mpiray tanindrazana toy ny tao anaty hetsika nataon'ny mpianatra tany amin'ny oniversiten'i Toamasina na ny tany Toliara, izay nilazana fa hanaovana fanadihadiana kanefa hatramin'izao tsy hita izay tohiny sy niafaràny. Araka izany tsy nampiraika ny olom-pirenena ny teny nambaran'i Andry Rajoelina, fa niteraka ahiahy aza fa ho very an-javony toy ny raharaha maro ilain'ny vahoaka fanazavana sy mangarahara ka hanambarana ny marina. Ny ahian'ny mpamakafaka sy mpanaraka ny raharaham-pirenena aza, dia ny mbola hitohizana na ny hitrangan'ny toy izao ihany any aoriana raha mahita ny fihetsik'ireo lazaina ho mpitandro filaminana tsy misaina afa-tsy ny baiko nomena azy amin'ireo mpanohitra sy mikasa haneho hevitra na dia amin'ny faritra voafefy aza. Anisan'ny antony anambarany izany ny nitranga teny amin'ny Magro Behoririka ireny sy ny tany amin'ny faritra samihafa toy ny tany Antsiranana na Mahajanga sy ny toeran-kafa. Mampianahy fatratra ny lalan-kizorana na ny hitondrana ny firenena, ary io no efa ambara mandrakariva vao tany am-piandohan'izao fitondrana izao aza izany, fa mandeha amin'ny lalana minkitoantoana na lalan-dratsy ny firenena. Vao mainka manamarina izany ny zava-misy tato ho ato.

Sôh'son

Rina Randriamasinoro : Vono olona tao Ikongo Ny fototry ny olana no tena tokony hitadiavana vaha-olana

Manoloana ny namoizana aina mpiray tanindrazana tany Ikongo dia naneho ny heviny ny SGTIM Rina Randriamasinoro. Amiko hoy izy matoa ny olona mitaky fitsaram-bahoaka dia tsy matoky ny mpitandro filaminana sy ny rafi-pitsarana noho ny antony samihafa. Olona 4 no narovana tamin'izany raharaha izany, vokatry olona maherin'ny 20 no maty ary maro no naratra. Samia mandinika fa efa tsy mandeha araky ny tokony ho izy intsony ny zava-misy ankehitriny. Mirary fiononana hoan'ny havan'ny maty ary mirary fahasitranana ho an'ireo mbola manaraka fitsaboana. Mirary soa ho an'ny Malagasy rehetra.

Helisoa